

nennen es eine von dem Gestirn herrührend/ fewrig/ ansteckende Kranckheit/ welche mit ihren verborgenen giftigen Dunst/ vnd Saamen heimlich in den Leib einschleiche/ das Herz/ Hirn/ vnd Leber ganz eilend einnehme/ vnd endlich mit Hülff des angezündeten Schwefels durch das zusamb geflossene Sals an unterschiedlichen Orthen des Leibs schwarze Flecken/ doch meisten theils bey den Ohren/ in den Nachsen/ Reiben/ oder schlichten der Heyldrüsen/ böse giftige Geschwer/ vnd Beulen verursache. Vnd entstehet zwar solches Ubel nicht allein zu gewisser Zeit/ vnd in einen besondern Orth/ oder Landschaft/ sondern auch bisweilen also grausamb/ sowol im Frühling/ als im Herbst/ sowol im Winter/ als im Sommer/ ja durchstreichet manchmal vil Stätt/ vnd Länder zugleich/ oder auch die ganze Welt/ achtet weder Stärck noch Berck/ weder Jugend noch Tugend/ weder Geschlecht noch Recht/ weder Gunst noch Kunst/ weder Gestalt noch Gewalt/ weder Guet noch Mueeth/ sondern macht bald disem/ bald Jenem den Garauß.

Daß aber die Pest jederzeit eine sonderbare Art/ Natur/ vnd Eigenschafft eines Giftes in sich habe/ welche weder von dem hochgelehrten Galeno, noch von denen anderen/ wiewol hocheerleucht: vnd erfahrenen Arzten hat können erkennen werden/ sondern auch in einen übernatürlichen gähling ansteckenden/ vnd gleichsamb Göttlichen Gewalt bestehe/ so dem Menschlichen Verstande zu hoch/ deren Wesen/ vnd Natur ganz geheim/ verborgen/ vnd unergründlich/ erscheinet auß dem/ daß sie erstlich in den Menschen so geschwind/ ja oftmaln so gähling anfällt/ daß er dem Tode schon gelisert/ ehe er sich kaum recht krank befindet/ wie solches mit sehr vilen Exempeln auß den Geschichten/ vnd täglicher Erfahrung zu beweisen. Zum anderten/ daß dise erschröckliche Kranckheit/ sich nicht durch die jenige Mittel/ durch welche andere Leibs Gebrechen/ vnd Gifte/ abwenden/ vnd vertreiben läßt/ sondern ganz absonderliche/ vnd geheime Pest Arzneyen erfordert/ welche aber wegen der

wun